

奉天通志

第十六箇之六

奉天通志卷二百六十

金石八

石刻

石刻七

清下

御製開國佐運功臣武勳王揚古里碑

康熙三十九年

朕惟我國家勗建丕基開無疆之景運旣篤生神聖英武之君

以翦除亂逆啓闢疆宇戡定諸邦一統之盛肇於東土其時則有

一德一心之佐殫忠戮力經營四方以翊鴻猷而成大業蓋天寶

挺生異才鍾山岳之靈挾風霆之氣貞誠不貳毅勇無倫名高百

戰之勳位超五等之爵垂聲竹帛配食廟廷以與國家共承休

祉子孫世衍其澤是豈偶然者哉當我列祖之龍興也一時人

材蔚起猛士如雲戰將如雨以藝勇稱以功名顯者不可勝數而

功冠諸臣爲一代元勳則開國佐運武勳王揚古里尤爲傑出焉
朕嘗恭覽 列祖實錄考武勳王行事折衝行間則戰必勝攻必
克平居則矢忠直贊謀畫豐功偉績至今焜耀簡編未嘗不緬想
英風興懷往蹟昔人創造艱難枕戈擐甲櫛風沐雨之勞恆流連
往復不能去於懷也歲在戊寅朕巡行舊京展祀 陵寢追維
祖宗功德隆盛并及當時佐命之臣丘壠所在皆遣官致祭而於
武勳王之墓特親至奠醑以示優崇仍復專官祭享蓋功在社稷
以死勤事古人爰有明禋之典朕篤念勳庸用申異數併爲文勒
諸貞石以昭示於無極焉

康熙三十九年 月

按碑題開國佐運功臣武勳王揚古里碑揚古里事蹟已錄於

崇德二年碑按語此碑言歲在戊寅巡幸舊京展祀陵寢當時
佐命之丘壠皆遣官致祭而於武勳王之墓特親至奠醑以示
優崇云云東華錄康熙三十七年戊寅十月丁巳謁福陵昭陵
車駕至盛京己未上臨奠武勳王揚古利直義公費英東宏毅
公額亦都墓卽其事此碑應合崇德二年揚古里碑彙錄但仍
書揚古里不書揚古利仍有異同蓋國初止譯音並無定字也
自是凡車駕東巡揚古利諸功臣墓必賜奠優禮功臣軼於宋
明矣

重修海城三義廟碑記

康熙四十年

知縣琅瑯舉人王沛恂撰

茲地喜事佛老及諸不經之神結會演戲奔走士婦而觀之自春

徂秋無虛日浪擲其金錢不顧相率以爲樂余蒞任年餘每與父老議改革而未果以民之泥於習俗而難與更始也預爲昌言以曉之者數矣會有以三義廟碑文來請者竊恐余之拒之也方啓齒而不欲盡其辭余聞而慨諾焉或曰公方謀改舊習乃亦逐流耶余曰此正吾之所以與民更始也夫見欲而趨恆情也一旦革其平日之所欲而驟以從我則羣然疑今就其平日所欲之中而示以若者所宜趨則其所不宜趨者不言而思已過半庶幾乎半釋其疑而乍信之機萌焉此吾所以樂乘其機而冀轉移也彼邑人之信佛老諸神也與三義廟等而吾獨取於此者蓋將舉其人之惑於虛無誕渺畏陰譴而諂希利益者反而求諸人倫切近有裨於世教人心之實事則茲三義廟者循名以核實可不深長思

哉劉關張之友道昭千古也以義始以義終也人咸稱爲三義也而吾謂其君臣之禮兄弟之情直與其友道並昭而爲三何也當漢末瓜分昭烈無投足之地而寄於小沛散於徐州敗新野走當陽依江夏若飄絮游萍不知何所底止而關張獨患難相從視曹之盛孫之強直鼠竊耳而險阻備嘗終成鼎足至其居同寢食出侍左右帶劍而危立此馬孟起所以一見折服而消其拔劍擊柱之心也厥後荊州失足舉國興師在昭烈豈不知修小信而忘社稷之仇後世有譏之者而兄弟急難志同生死真有爲同胞所羞對者嗟乎古之君子砥行礪志終其身於三綱五常之內而告無過焉斯足矣卽或履困而見節義其流傳不過一二事求其三義卓然若日月五星之經於天無智愚賢不肖仰奉而俎豆之者鮮

矣久之感則靈求則應幾與佛老諸神以禍福趨避奔走愚氓者
無別矣今思所其以廟食者不過三大倫之克合於義焉人果秉
其虔奉三義之心而力行以自勉上可以爭輝賢聖下亦不失爲
鄉里善人此誠民之可欲而宜趨者以視夫空虛誕渺之瞽惑人
竭蹶趨奉而迄無靈效者相去不亦遠哉竊怪夫普天率土廟祀
血食以奉關帝者所在皆是至欽其君臣兄弟朋友之義而並奉
一堂者罕見焉然則邑之人改關帝小像而爲三義廟也

始於康熙乙酉

之孟春竣工於
丙戌之季夏

其能見及乎此與否未之或知而與余今茲之意

竊有合焉用是不辭固陋而援筆以記之若夫撰文勒石以頌功
德而傳諸久遠先我而爲之者不知凡幾矣又奚俟余之贅詞爲
哉

按盛京通志王沛恂山東諸城舉人

康熙丁卯

康熙四十七年任海

城縣知縣

重修關帝廟碑記

康熙四十四年開原縣志

開原縣知縣羅鎰撰

粵稽遼志開原於古爲肅慎地於元爲開元路大明洪武始設城池其西南隅則崇壽禪寺浮屠屹然剏建自唐其東北隅有玄帝廟建於前明之時惟關帝廟自國朝定鼎以關東爲發祥重地畫郡邑置官守而後有之也余以丙子歲來蒞茲土每朔望至斯見其地勢閎敞規模頗具而頽垣斷瓦風雨剝落未嘗不欲更新之奈地瘠民稀力短心長遷延及今同邑文武僚屬下逮鄉耆之好義者莫不捐俸解囊鳩工庀材奔走共勦建正殿三楹左右兩廡

前軒中門角門繚以周垣聖像供器一一丹堊輝煌金碧璀璨凡向時之未有者增而擴之已有者修而整之他如鐘鼓戲樓山門斯以次第畢工而廟貌一時烜赫焉於是民人環請爲記余不能文竊思關聖夫子忠義塞乎天地貫乎古今卽山陬海澨凡有血氣莫不景仰開原地處邊陲猶能知所崇奉如此非神之靈爽實有保障之奚以至斯哉然而風俗之敦龐人心之慕義亦概可見矣是烏可無以記之歟廟始於康熙辛亥歲基址長二十九丈闊三十一丈僧人現眞現性共奉香火顧僅數椽爾暨丁卯而廟制增美猶未備也茲則百事具舉煥然聿新爰勒貞珉俾垂不朽云

北鎮廟碑文

康熙四十七年

醫巫閭屹峙東北爲幽州巨鎮昔虞帝封十有二山此其一也穹

崇磅礴靈瑞所鍾實護王氣以壯鴻圖與嶽瀆諸神並垂祀典朕
省方問俗嘗過其境望其佳氣鬱鬱葱葱上插霄漢下瞰蓬瀛懸
瀑飛流喬松盤蔚知其所以保障而迎休者蓋有素矣向錫扁額
式展褒崇而廟貌未隆無以昭顯特勅修造遣專官以恪乃事凡
所需給皆頒自內府始於康熙四十五年七月訖於本年十一月
不四月而告厥成工焉規制宏備輪奐維新紺宇琳宮照耀山谷
於時臣民瞻仰罔不欣悅而府尹臣奏請謂宜光文翰勒諸貞珉
朕御極以來勤恤民隱祇奉 天庥敬共神明罔敢稍斁維北鎮
之奕奕爲神京之翊輔嘉符凝集靈爽式憑神其永贊雍熙益弘
福祐錫蕃昌於庶類固不祚於萬年用慰朕精虔之至意爰樹穹
碑書重修歲月以示來茲

康熙四十七年

清重修奉天府學宮碑記

康熙四十九年

王化非聖道不行聖道非王化不久王化治則孔子之道益尊聖道尊則王者之化益大故建學明倫所以崇道統正人心而廣治化於無窮者也粵稽奉天自太祖高皇帝神武肇基太宗文皇帝式廓隆業勗興學校世祖章皇帝統一區夏文命誕敷今皇上天縱聖神德威翔洽無遠弗届仁義漸摩無思不服編戶之子釋耒橫經羽林之士投戈講藝詩書禮樂之盛四方郡國皆然矧奉天爲發祥首善之地設學以來雖規制漸增而二十餘年未遑修葺其何以仰副我皇上崇文重道之至意顧念遼左沃野千里生聚日滋騰 隆以譾劣材承乏京兆亦惟是勞來拊循之

不暇其又何忍以茲役重煩我父老子弟爲爰捐俸入不足謀之
同事諸鉅公又不足復謀之諸長吏謀之諸紳士僉樂相予志遂
鳩工庀材自聖殿而啓聖祠而兩廡而廟門而明倫堂胥巍然煥
然此皆昔圯而今修者也殿以外繚垣奕奕廟以前戟門峩峩又
皆昔無而今有者也經始於康熙四十八年七月十三日落成於
康熙四十九年閏七月初十日計工五千三百有奇計費一千一
百二十兩有奇役成而遊聖人之門者共知聖道之大將伯之助
其可泯歟夫明政刑正風俗者 天子之化也謹庠序飭倫紀者
孔子之教也今學校振興若此滿漢士子服習其中優游德教人
文蔚起不將與鎬京鐘鼓並美千古而不朽哉謹彙襄事諸賢鐫
之於石俾後有可考因并記之以詔學者 時

康熙四十九年歲次庚寅孟秋月上浣之吉

奉天府府尹閩鏞廖騰燿敬撰

奉天府府丞提督學政加二級孟世泰篆額

奉天府治中陞刑部浙江司員外郎金一鳳書丹

奉天府通判今卓異候陞拉都督理

承德縣知縣李尙隆監理

經歷司經歷張禹錫監修

儒學教授魯城督修

司獄司司獄李實

承德縣典史何之衍同督工

醫學正科党復照

捐修學宮姓氏

鎮守奉天將軍都統松柱 副都統巴勒 副都統托留 廣寧
防守尉常愛 原任遼陽章京沈獨立 盛京戶部侍郎董國禮
陞任理事官巴渣爾 理事官圖蘭等 原任工部侍郎席爾
圖 理事官楊柱等 陞任刑部郎中巴克善 禮部贊禮郎官
保 刑部筆帖式桑格 奉天府府尹廖騰燐 府丞孟世泰
陞任府丞吳一蜚 陞任府丞湯右曾 陞任府丞張德桂 陞
任治中金一鳳 卓異通判拉都 陞任錦州府知府顧大位
通判龔眉望 行取錦縣知縣裘奏 承德縣知縣李尙隆 原
任遼陽州知州富中琰 海城縣知縣王沛恂 蓋平縣知縣趙
守易 鐵嶺縣知縣焦獻猷 開原縣知縣李渥 錦縣知縣冷

又煦 寧遠州知州楊本植 廣寧縣知縣錢世勳 原任鐵嶺

縣知縣彭其儁 奉天府經歷司經歷張禹錫 奉天府儒學教

授魯城 遼陽州儒學學正陳五紀 海城縣儒學訓導李蘭

原任蓋平縣儒學訓導劉宸緯 鐵嶺縣儒學訓導齊鉞 開原

縣儒學訓導李一鶚 原任錦州府儒學教授蔣玠人 遼陽州

吏目魏顯謨 錦縣儒學教諭王顥 寧遠州儒學學正李應甲

陞任廣寧縣儒學訓導王子樾 承德縣典史何之衍 巨流

河巡檢王統 海城縣典史姚文斗 蓋平縣典史余棠 開原

縣典史徐時敏 錦州府經歷趙昌柱 錦縣典史馮之翰 寧

遠州吏目胡嗣晉 中後所巡檢馮英傑 廣寧縣典史朱嗣隆

原任義州巡檢王佐才 滿洲貢生塔思哈 馬爾泰 監生

佛保住 漢軍貢生宋之藩 穆琛 承德縣傅作楫 劉皚

李錦 戴梓 舉人葉珍文 鐵顯祖 教習王光耀 監生袁

應兆 奉天府儒學生員阿爾賽 劉虞輔 劉有勳 紀可信

蘇宏 宋應祿 唐廷貺 吳渭 魏概 魏樞 袁維翰

張希遜 吳海 張元瑞 楊文奎 祿都弘 韓泰 金山

拉哈 馬四海 康亮工 繆朗 李雲錫 陳留武 李耀祖

劉澈 田沛然 戴亨 孫莢 夏之煥 劉久徵 王訓

馮三畏 陳自謙 趙國弼 王鴻儒 艾世興 門習禮 李

九明 楊時雍 李自芳 王明標 劉宗孟 高峻 柴維楨

柴國楨 宋國佐 宋國儒 袁維屏 朱天齋 劉朝宗

劉東寧 唐廷暄 唐廷緯 李養時 楊裕祖 葉競秀 法

山 杜起 錦縣貢生陳芝秀 海城縣生員李成錦 隨任魯
錫蘭 童生李自芬 張廷卜 齊三泰 韓永承 遼陽州紳
衿並新進生員孫繼美 謝謙 蔡蔚等 海城紳衿並新進生
員李之蛟 王遴 王錫蕃等 蓋平縣紳衿並新進生員韓需
韓炎旭 韓禎等 鐵嶺縣紳衿並新進生員馬有麟 程玉
李應春等 開原縣紳衿並新進生員王玉 郝百祿 左澎
等 錦州府紳衿並新進生員王天爵 趙希普 張伸等 錦
縣紳衿並新進生員才時變 王心明 劉沛等 寧遠州紳衿
並新進生員李作楫 王道明 常學洙等 廣寧縣紳衿並新
進生員張問明 張駿惠 馬一麟等 江南寧國府旌德縣湯
弘瑞鐫